



**Broj predmeta:** 05-000978/22  
**Broj akta:** 01.1-1413ЕК-001/22  
**Datum,** 27. 12. 2022. godine  
**Mjesto,** Brčko

Na osnovu člana 16. i člana 17. stav (5) Zakona o Vladi Brčko distrikta BiH („Službeni glasnik Brčko distrikta BiH“, broj: 22/18 – prečišćeni tekst, 49/18, 8/19, 10/19 i 32/19), u skladu s članom 4. stav (3), a u vezi s članovima 3. i 5. Zakona o praznicima Brčko distrikta BiH („Službeni glasnik Brčko distrikta BiH“, broj: 19/02 i 19/22), gradonačelnik Brčko distrikta BiH d o n o s i

## **U P U T S T V O**

### **O RADU U DANE PRAZNIKA BRČKO DISTRIKTA BOSNE I HERCEGOVINE**

#### **Član 1.**

Ovim uputstvom uređuje se rad svih institucija i organa javne uprave Brčko distrikta BiH, preduzeća, preduzetnika i drugih pravnih lica (u daljnjem tekstu: subjekti) u dane praznika radi zadovoljenja neophodnih potreba građana na području u Brčko distriktu BiH.

#### **Član 2.**

(1) U skladu sa Zakonom o praznicima Brčko distrikta BiH praznici su:

- a) Nova godina,
- b) Dan uspostavljanja Brčko distrikta BiH,
- c) Praznik rada.

(2) Nova godina se slavi 1. i 2. januara, Dan uspostavljanja Distrikta 8. marta, Praznik rada 1. i 2. maja.

#### **Član 3.**

(1) U dane praznika na području Brčko distrikta BiH mogu da rade subjekti koji:

- a) obavljaju djelatnost pružanja medicinskih, zdravstvenih i veterinarskih usluga,
- b) obavljaju djelatnost pružanja apotekarskih usluga, pri čemu poslovni subjekti koji u svom sastavu imaju više poslovnih jedinica (apoteka) određuju dežurstvo samo jedne poslovne jedinice,
- c) obavljaju djelatnost proizvodnje i prodaje hljeba, peciva i drugih pekarskih proizvoda,
- d) obavljaju djelatnost trgovine na malo motornim gorivima i mazivima (benzinske pumpe),
- e) obavljaju komunalne djelatnosti i djelatnosti prevoza putnika,
- f) se bave djelatnostima čija priroda zahtjeva neprekidan rad u vremenu koje je neophodno za obavljanje tog rada,
- g) obavljaju ugostiteljsku djelatnost.

#### **Član 4.**

(1) Za vrijeme praznika Brčko distrikta BiH koji se praznuju dva dana, drugog dana praznika, pored subjekata iz člana 3. ovog uputstva, mogu da rade i svi maloprodajni objekti i uslužne radnje i to vremenu od 07.00 do 14.00 sati.

(2) Praznici Brčko distrikta BiH su prenosivi te, ukoliko neki od praznika pada u nedjelju, prvi radni dan nakon praznika će biti neradni dan, a za drugi dan praznika dozvoljava se rad u skladu sa stavom (1) ovog člana.

#### **Član 5.**

Ovim uputstvom zadužuju se šefovi Odjeljenja za javne poslove, Odjeljenja za zdravstvo i ostale usluge, Odjeljenja za javnu sigurnost i Odjeljenja za javni registar u Vladi Brčko distrikta BiH kao i rukovodioci institucija u Brčko distriktu BiH da povodom dana koji su utvrđeni kao praznici Brčko distrikta BiH putem dežurstava organizuju rad u odjeljenjima i institucijama na način da se uz održavanje minimuma funkcionalnih kapaciteta osigura kontinuirano i nesmetano pružanje vitalnih usluga građanima.

#### **Član 6.**

Nadzor nad primjenom ovog uputstva vršit će Ured gradonačelnika – Inspektorat.

#### **Član 7.**

Ovo uputstvo stupa na snagu danom donošenja, a objavit će se u „Službenom glasniku Brčko distrikta BiH“.

**GRADONAČELNIK**

**Esed Kadrić**

#### **DOSTAVITI:**

1. Svim odjeljenjima Vlade – x12,
2. Uredu gradonačelnika – x2,
3. Glavnom koordinatorskom centru Vlade Brčko distrikta BiH,
4. Policijskoj upravi Brčko distrikta BiH,
5. JP „Komunalno Brčko“ d. o. o. Brčko distrikta BiH,
6. JP „Putevi Brčko“ d. o. o. Brčko distrikta BiH,
7. JZU „Zdravstveni centar Brčko“ Brčko distrikt BiH,
8. Direkciji za finansije Brčko distrikta BiH,
9. Uredu za upravljanje javnom imovinom,
10. Inspektoratu,
11. Sekretarijatu Vlade – x2,
12. Skupštini Brčko distrikta BiH,
13. „Službenom glasniku Brčko distrikta BiH“,
14. Arhivi.